

所見不過浮浮泛泛而已有則更當勉之無則自問安乎  
仁

仁者人也人而不仁欲成真人無有是處吾謂儒之所謂仁卽佛之所謂舍利仙家之所謂金丹也心者仁之舍也仁者心之主也但將此心打掃乾淨隨覺元氣復來四肢百骸無不充暢旋視萬物同一自得之象故曰一日克己復禮天下歸仁爲天地生生之理具於人心謂之曰仁取其能生故也果核之實亦謂之曰仁亦取其能生故也人何不將此生生之理而存養於心哉吳臨川曰仁者壽吾嘗持此觀天下之人凡氣之溫和者壽質之慈良者壽量之寬宏者壽貌之厚重者壽言之簡默者壽蓋溫和也慈良也寬宏也厚重也簡默也皆仁之一端也其壽也宜矣臨川論有仁之一端而且能得壽者併五者而俱有之其壽之長也不問而可知矣仁者樂山夫山之爲物也亘古不遷是凡物之有壽者莫山若也山能常靜仁者常靜靜則神凝氣結精滿形固豈有不壽者哉

白髮老人曰顏子問仁孔子教之以克己復禮行乾之道令其一刀兩段卽禪家所謂頓教也仲弓問仁孔子教之以居敬行恕行坤之道令其循序漸進此禪家所謂漸教也自闕里已用此法教人又何待南能北秀始有頓漸之殊哉